



DP
735
A2Y86
177/a
v. 60





御批歷代通鑑輯覽卷之一百十九

附明唐桂二王本末

桂王二

戊子我

大清

世祖章皇帝順治五年春正月總兵金聲桓叛以江西附于桂王由榔

聲桓本左良玉部將

王師南征聲桓自九江率衆歸附令與降將王體忠合營規取江右聲桓計殺體忠以其黨王得仁代之得仁亦闖部裨將所稱王雜毛者也江西旣平授聲桓總兵恃衆驕恣江西撫按每裁制之聲桓得仁心怏怏嘗遣其

客雷德復通款于桂王由榔。以聲桓妻子在京師。未敢發。會有以兩人陰事告巡按御史董學成者。聲桓得仁懼。適其孥亦自京師至。反謀遂決。以是月二十五日。閉城門。部勒全營圍學成官署。殺之。并及副使成大業。執巡撫章于天於江中。迎故明在籍大學士姜曰廣入城。以資號召。遣人奉表由榔。由榔封聲桓昌國公。得仁新喻侯。得仁統兵陷九江。揚言將窺江寧。或說聲桓曰。贛州居省上流。文武督在焉。宜先攻贛。不然。且伺我後。聲桓從之。立召得仁還。與并力犯贛。以宋奎光守南昌。賊圍贛州。

大兵守禦甚固。久之不能拔。聲桓乃令得仁往綴章貢上。

下。而引兵踰嶺犯雄韶。

故明朱容藩僭稱監國于夔州。尋敗死。

時四川地尚附于桂王由榔。容藩本明宗室。奉由榔命爲總制。而李乾德。楊喬然。江爾文。又先後以巡撫至。各自署置。官多於民。諸將亦皆擁兵自雄。由榔總督尙書樊一蘅。令不行。惟保叙州一郡。會廣西危迫。川中相傳由榔已死。容藩遂僞稱監國。天下兵馬副元帥。建行臺于夔州。稱制封拜。御史錢邦芑傳檄討之。堵允錫以湖南地失無所歸。由貴州走蜀。見容藩。責以大義。曉譬利害。其黨頗散。由榔命其大學士呂大器代王應熊督師四川。大器至涪州。過將軍李占春營。具言由榔無恙。容

藩乘機僭竊。當得罪。占春以爲然。李乾德亦檄諸鎮致討。容藩窘。乃北依譚詣兄弟。以兵攻石砬土司。占春援之。容藩兵敗。走死雲陽。

魯王以海遁居琅琦島。

時以海竄居海島。鄭彩專柄。與其大學士熊汝霖有隙。遣兵潛害之。并害汝霖幼子。又殺其義興侯鄭遵謙。皆

投屍海中。

汝霖遵謙。

賜諡忠節。賜諡節愍。

以海以錢肅樂爲大學

士。

二月。我

大清兵至靈川。桂王由榔奔南寧。

郝永忠在桂。以不得鈔掠。惡城外團練兵。盡破水東十

八村殺戮無算。與瞿式耜構難。式耜力調劑。永忠乃移駐興安。至是。

大兵前驅至靈川。永忠戰敗。奔入桂林。請由榔卽夕西走。式耜力持不可。言督師警報未至。無大恐。若播遷不已。國勢愈弱。兵氣愈難振。民心皇皇。復何所依。不聽。由榔左右皆請速駕。式耜又言。俟督師還。背城借一。勝敗未可知。若以走爲策。則何地不危。反覆數百言。由榔曰。卿不過欲予死社稷爾。式耜爲泣下沾衣。嚴起恒曰。明日當議之。迨夜半。由榔已行。甫出城。永忠卽大掠。捶殺太常卿黃太元。式耜家亦被掠。家人矯何騰蛟令箭。乃得釋。日中。趙印選諸營自靈川至。亦大掠。城內外如洗。永

忠走柳州。印選等走永寧。明日。式耜息城中。餘燼安撫
遠近。焦璉及諸鎮。周金湯。熊兆佐。胡一青等。各率所部
至。騰蛟亦自永福至。民心粗定。由榔自象州走南寧。故
詹事朱天麟。寓居安平土州。由榔召為大學士。天麟請
親率土兵略江右。不聽。天麟乃趨謁由榔於南寧。天
麟。字游初。崑山人。

三月。我

大清兵攻桂林

大兵偵知桂林兵變。乘虛進襲。直抵北門。何騰蛟督焦璉
胡一青等。分三門力戰拒守。

大兵乃還駐全州。城獲全。時桂王由榔在南寧。瞿式耜遣
使慰由榔。及太妃起居。由榔始知式耜無恙。為之泣下。

我

大清兵克興化。遂盡復魯王以海所陷諸州縣。

魯王以海自航海後。數遣兵擾閩境。先後攻陷三府一州。二十七縣。軍勢頗盛。至是

王師進討。克興化城。以海大學士朱繼祚。及叅政湯芬。字

侯嘉善人。給事中林眉。字小眉。莆田人。知縣都廷諫。杭州人。等並死之。

繼祚。賜諡忠節。芬。賜諡節愍。遂連克永福。長樂。建

寧諸郡縣。永福破。邑人給事中鄢正畿。御史林逢經。俱

李氏同死。建寧破。守將王祈巷戰不勝。自焚死。正凡

以海所據地。一時盡復。以海不敢更犯閩。乃謀窺浙東。

時沈宸荃棄家從以海于海外。以海擢為大學士。錢肅

而死。故相葉向高曾孫進晟葬之福清黃檗山中。肅樂。賜諡忠節。

夏四月。提督李成棟叛。以廣東附于桂王由榔。

成棟本高傑部將。以徐州總兵來降。從

王師平粵。用爲提督。成棟不樂受總督佟養甲節制。常懷

異謀。及是。金聲桓誘之同反。計益決。是月十一日。黎明

成棟令其兵集教場。聲言索餉欲爲變。成棟請養甲出

城撫輯。養甲至。衆兵呼噪。劫之以叛。遂傳檄各屬。遣使

附于由榔。廣西巡撫耿獻忠聞之。亦舉梧州叛降。由榔

封成棟惠國公。養甲襄平伯。以獻忠爲兵部尚書。初。

兵破廉州。推官張孝起謀以兵拒。就獲不屈。羈軍中。至是脫歸。由榔以爲吏科給事中。張孝起。吳江人。

五月。桂王由榔遣兵陷全州。

時金聲桓。李成棟相繼叛。

大兵在湖南者姑退。何騰蛟乘間復陷全州。遣保昌侯曹志建。宜章侯盧鼎。新興侯焦璉。新寧侯趙印。選等進攻永州。

我

大清兵圍南昌。

時征南大將軍都統譚泰等帥師討金聲桓。連克九江。南康。饒州。諸府。進薄南昌。而令別將搜麥源。青嵐諸道。薄西山。未下營。血刃已數百里。

大兵遂圍南昌。聲桓兄成功密約來降。宋奎光諜知殺之。大兵攻得勝門。城壞數處。奎光囊土塞之。得不破。報至贛。

聲桓等大懼。撤兵急回。贛人掩擊。亡其大半。至南昌。中伏。大敗于七里街。遂盡撤城外屯兵入城。堅壁不出。其部將請戰。不聽。遣所署江西巡按吳尊周乞師于桂王。由榔尊周盡匿敗狀。但盛誇其強。由榔喜。以尊周為總督。

大兵見聲桓終無出兵意。乃用鎖圍法。東自王家渡屬灌城西。西自雞籠山屬生米渡。掘濠載版起土城。自是內外耗絕。王得仁自軍敗後。不復親督陣。方娶武都司女為繼室。繡旆親迎。金鼓喧巡。瞭者皆望而大駭。莫疑為王雜毛娶婦也。已城中糧盡。人相食。乃大出居民。聲桓等情實盡為。

大兵所得。因以餘暇略定諸郡縣。聲桓等但守空城而已。

時揭重熙傳鼎銓皆聚兵應聲桓由榔以重熙爲兵部尚書總督江西兵鼎銓爲兵部右侍郎兼翰林院侍讀學士重熙以萬餘人犯邵武敗還鼎銓往援聲桓亦敗走。大兵克都昌督師尚書余應桂死之。傳鼎銓字維衡臨川人余應桂。賜諡忠節。

六月桂王由榔至潯州。

李成棟請由榔入廣州由榔將赴之瞿式耜請還桂林疏言駕若東幸軍中將帥謂朝廷樂新復之士成棟亦有邀駕之嫌號令既遠人心渙散臣不能制也再疏令檢討蔡之俊往迎又疏令給事中蒙正發往迎由榔俱不報遂至潯州封潯帥陳邦傳爲慶國公。邦傳請世居廣西如黔國公故事大學士朱天麟執不允邦傳怒以慶國公印尙方劒擲天麟舟中要必得仍報不允瞿式耜亦持疏劾之會諸臣多爭者邦傳乃止。

御批歷代通鑑輯覽 卷之二十一
秋八月桂王由榔至肇慶

瞿式耜慮李成棟挾由榔自尊如劉承允事復上疏力爭由榔乃駐肇慶成棟進謁由榔拜成棟大將軍以其子元允爲錦衣指揮使封南陽伯成棟言式耜擁戴元臣不宜久在外由榔召式耜式耜願留桂林終不入然聞政有闕失必具疏力諫嘗曰臣與主上患難相隨休戚與共不同他臣一切大政自得與聞由榔雖褒納不能盡從也時由榔諸臣各樹黨從成棟至者曹華耿獻忠洪天擢潘曾緯毛毓祥李綺自誇降附功氣陵朝士自廣西從由榔至者朱天麟嚴起恒王化澄晏清吳貞毓吳其雷洪士彭尹三聘許兆進張孝起皆自恃舊臣

詆斥曹耿等。久之。復分吳楚兩黨。主吳者天麟。孝起。貞毓。化澄。及李用楫。堵允錫。萬翹。程源郭之奇。皆內結馬吉翔。外結陳邦傳。主楚者都御史袁彭年。少詹事劉湘客。給事中丁時魁。蒙正發。金堡。皆外結瞿式耜。內結李元允。元允方握政柄。彭年等倚爲心腹。攬權殖貨。勢甚張。時人目爲五虎。彭年嘗論事由榔前。語不遜。由榔責以君臣之義。彭年勃然曰。倘向者惠國以五千鐵騎。鼓行而西。君臣義安在。由榔變色。大惡之。彭年等謀攻去吉翔。邦傳權可獨擅也。令堡疏陳八事。劾邦傳十可斬。吉翔及中官龐天壽。大學士起恒。化澄與焉。起恒。化澄乞去。天麟奏留之。堡與時魁等復相繼劾起恒。吉翔。天壽無已。太妃召天麟。面諭武岡危難。賴吉翔左右。令擬諭嚴責堡。

等天麟爲兩解。卒未嘗罪言者。而彭年等益怒不止。由榔知羣臣水火甚。令盟於太廟。然黨益固不能解。

冬十月。李成棟犯贛州。敗走。

李成棟駐南雄。盡率部衆及崗蠻土寇。號稱百萬。度嶺犯贛州。以救南昌。營柵未立。會巡撫劉武元。總兵胡有陞等出擊。大敗之。成棟單騎走。斬首萬餘級。俘獲無算。

成棟退屯南康縣。

李成棟忌佟養甲。密請除之。桂王由榔。命養甲祭其父桂王常瀛于梧州。

遣盜邀殺之白沙洲。

十一月。桂王由榔遣兵復陷湖南州縣。

何騰蛟遣曹志建等攻永州。圍城三月。大小三十六戰。遂爲所陷。未幾。桂王由榔監軍御史余鯤起。職方主事

李甲春陷寶慶。別將陷衡州。馬進忠陷常德。王進才。李赤心。高必正等陷桃源。澧州。臨武。藍山。道州。靖州。荆門。宜城。諸州縣。湖南地大半復爲由榔所據。騰蛟議進兵長沙。瞿式耜以機會可乘。請由榔還桂林。圖出楚之計。不納。

己丑
我

大清

世祖章皇帝順治六年春正月我

大清兵至湘潭。桂王由榔督師大學士定興侯何騰蛟死之。由榔總制堵允錫與馬進忠有隙。令李赤心。高必正爭進忠所取常德。進忠大怒。盡驅居民出城。焚廬舍走武

圖寶慶守將王進才亦棄城走。他守將皆焚營潰。湖南州縣爲一空。赤心等所至見皆空城。旋棄走。東趨長沙。騰蛟時駐衡州。大駭。乃令允錫向江西。檄進忠由益陽出長沙。期諸將畢會。而親詣忠貞營。邀赤心入衡。部下卒六千人。懼忠貞營掩襲。不護行。止攜吏卒三十人往。將至。聞其軍已東。卽尾之至湘潭。湘潭空城也。赤心不守而去。騰蛟乃入居之。

大兵知騰蛟入空城。遣將徐勇引軍入。勇。騰蛟舊部將也。率其卒羅拜勸騰蛟降。騰蛟大叱。勇遂擁之去。絕食七

日。乃殺之。諸軍遂散。赤心等走廣西。

騰蛟賜諡忠誠。

桂王由榔罷其大學士朱天麟等官。

陳邦傳計金堡官臨清。嘗降流賊。受其職。且請堡爲己監軍。朱天麟因擬諭譏堡。堡大憤。丁時魁乃鼓言官十六人詣閣詆天麟。至登由榔所居殿大譁。棄官擲印而出。由榔方坐。與侍臣論事。大驚。兩手交戰。茶傾於衣。急取還天麟所擬而罷。天麟遂辭位。由榔慰留再三不可。陛辭。叩頭泣。由榔亦泣曰。卿去。余益孤矣。初。時魁等謂所擬出嚴起恒意。欲入署毆之。是日起恒不入。而天麟獨自承。遂移怒天麟。逐之去。并逐其弟爲行人。兩子爲御史。中書舍人者。天麟移居慶遠。王化澄貪鄙無物望。亦爲時魁等所攻。碎冠服辭去。由榔乃召何吾騶。黃士俊入直。吾騶尋亦爲堡等排去。獨士俊起恒在。由榔乃復召天麟。天麟不至。上疏言。今國勢累卵。路人

皆知而建言者絕不問瑣屑一人一事掉頭以爭曰我古遺直也。今而後請勿以四方無利害者執為極重大事。而獨使主上憂社稷。其意亦為堡等發也。

臣等謹案明自神宗以後科道諸臣懷私逞臆把持朝政黨禍交興。桂王崎嶇嶺海。事急燃眉。乃金堡等猶欲呼朋引類。任意恣行。甚至擲印喧嘩。弁髦主上。及兩粵就平。堡不能殺身。又復詭托縉流。造作語言。以文其畏死偷生之跡。臣等伏讀前後所頒聖諭。仰見我

皇上大公彰瘴。

燭照靡遺。抒忠盡節者雖阻兵犯順而猶曲予

闡揚。若進退無據之徒縱獲保首領而

斧鉞維嚴亦必追加誅殛。是非褒貶一準情理之平。所以

維風教正人心。

垂訓萬世者至深且切矣。

我

大清兵克南昌金聲桓等伏誅。

聲桓部將湯執中守進賢門其偏裨約來降。

大兵因以厚陣佯攻得勝門。礮聲聞三百里。聲桓等悉衆赴之。而奇兵已從進賢門登雲梯而上。城遂破。聲桓中二矢。赴池水死。生擒王得仁。及宋奎光。劉一鵬。郭天才等皆伏誅。故明大學士姜曰廣投僕家池死。瑞州。臨江。袁州。諸府皆平。

曰廣。賜諡忠確。

二月。我

大清兵至信豐。李成棟敗死。

成棟再度嶺犯贛州。不能克。屯兵信豐。

大兵既定南昌。沂流援贛。直趨信豐。成棟兵敗。諸將欲拔營歸。成棟不可。天久雨。召諸將議事。去者已大半。成棟命酒痛飲。既大醉。左右挽之上馬。渡水。水漲。人馬俱沈。

三日後見成棟植立水中始知其死諸營皆潰
大兵追至南雄城下而還桂王由榔以杜永和爲兩廣總
督駐廣州代成棟閣可義守南雄可義尋死以羅成耀
代之命瞿式耜以留守督師兼江楚各省兵馬
三月我

大清兵克衡州

何騰蛟旣死堵允錫乃入衡州與胡一青固守

大兵至戰敗一青走廣西允錫走桂陽

大兵遂入衡州初李赤心之入廣西也緣道淫掠龍虎關
守將曹志建惡之并惡允錫或說志建允錫將召忠貞
營圖志建志建夜發兵圍允錫殺從卒千餘允錫及子

逃入富川。猺峒志建索之急。猺潛送允錫於監軍僉事何圖復。間關達梧州。會桂王由榔遣嚴起恒。劉湘客安輯忠貞營至梧。而赤心等已走賓橫二州。乃載允錫謁由榔於肇慶。志建遷怒圖復。誘殺之。闔門俱盡。

臣等謹案明季兵政廢弛。上無約束。任其縱肆。或緣道淫掠。或索金鼓譟。卒至闖獻橫行。無一人足資禦侮者。況復粵西假息。予遺幾何。諸將如郝永忠。李赤心等。尚復縱兵焚劫。曹志建且擅殺職官。闔門俱盡。武臣恣橫。紀律蕩然。亦由習見崇禎時之悍將驕兵。而貽害遂至於此極也。

我

大清兵克福安。

魯王以海大學士劉中藻既陷福寧。旋移駐福安。固守不下。至是。

大兵破城。中藻冠帶坐堂上。爲文自祭。吞金屑死。時以海已盡失閩地。鄭彩見事勢窮蹙。遂棄以海去。張名振阮進奉以海遁居南田。

劉中藻賜謚烈愍

夏四月。孫可望遣使求封於桂王由榔。

可望旣得雲南。故明在籍御史臨安任僎議尊可望爲國主。以干支紀年。鑄興朝通寶錢。而李定國劉文秀故可望同輩。一旦自尊。兩人不爲下。可望以事杖定國演武場。欲以威衆。孫李益有隙。可望聞桂王由榔在肇慶。李錦等並加封爵。念得朝命加王封。庶可相制。議遣使奉表。楊畏知亦素以尊主爲言。乃遣畏知及永昌故兵部郎中龔彝赴肇慶。進可望表請王封。由榔大學士嚴

起恒給事中。金堡等皆持不可。畏知曰：「可望欲權出劉

李上爾。今晉之上公。而卑劉李侯爵可也。」乃議封可望

景國公。賜名朝宗。定國文秀皆列侯。遣大理寺卿趙昱

為使。加畏知兵部尚書。彝兵部侍郎。同行。時堵允錫駐

梧州。

先是允錫至肇慶。結歡馬吉翔。欲圖李元允。由榔不悅。丁時魁。金堡又論其喪師失地。由榔因令其

總統兵馬移駐梧州。

允錫曾賜空敕。得便宜行事。昱就與謀。允錫

念李赤心等不足恃。欲遙結可望為強援。矯命改封平

遼王。易敕書以往。

允錫尋至潯州。自恨發病卒。

武康伯胡執恭者。慶

國公陳邦傳中軍也。守泗城州。與雲南接。亦欲自結可

望。言於邦傳。先矯命封可望秦王。曰：「藉其力。可制李赤

心也。」邦傳乃鑄金章曰：「秦王之寶。」填所給空敕。令執恭

齊行。可望大喜。郊迎。亡何。畏知等至。可望駭不受。曰。我已封秦王矣。畏知曰。此僞也。執恭亦曰。彼亦僞也。其時桂王所封實景國公。敕印故在。可望怒。辭敕使。下畏知及執恭獄。

秋七月。桂王由榔遣兵犯南安。敗走。

桂王由榔遣兵度嶺。犯南安。別分兵兩路。窺信豐。逼崇義。

大兵會擊。奪其木城。大破之。

八月。我

大清兵定湖南。

定遠大將軍鄭親王濟爾哈朗等帥師克辰州。進攻寶

慶王進才馬進忠等戰敗遁去。分兵定沅州靖州。守將皆望風棄城走。至永州。周金湯熊兆佐等立柵大松橋拒戰。敗之。下其城。復克黎平府。郝永忠奔永從縣。

大兵躡其後。永忠返戰。擊破之。永忠攜妻子潛遁。

九月。魯王以海遁入舟山。

以海以七月中至健跳所。

大兵圍之。會阮進救至。得解去。時張肯堂方以私財募兵海上。以海貽肯堂書云。將北還舟山。約肯堂共事。至是以海遂遣張名振。阮進合軍討斬黃斌卿。入居舟山。以肯堂爲大學士。吳鍾巒爲禮部尚書。

冬十二月。我

大清兵克南雄。

平南王尚可喜靖南王耿繼茂等帥師征廣東。除夕潛兵襲南雄。桂王由榔守將江起龍倉皇棄城去。羅成耀方駐韶州。聞之亦棄輜重走高州。

庚寅我

大清

世祖章皇帝順治七年春正月我

大清兵克韶州。桂王由榔奔梧州。

是月六日。

大兵下韶州。由榔聞庾關不守大懼。急登舟走梧州。加馬吉翔兵部尚書。與南陽伯李元允督守肇慶。瞿式耜馳

疏請留不聽。陳邦傳謁由榔梧州。以其將茅守憲率兵入衛。

二月。桂王由榔下其給事中金堡等獄。

堡等既連逐大臣。勢益橫。戶部尚書吳貞毓等欲排去之。畏李元允爲援。不敢發。會由榔走梧州。元允留肇慶。陳邦傳適遣兵入衛。貞毓郭之奇。萬翱。程源。乃合諸給事御史。劾袁彭年。劉湘客。丁時魁。蒙正發。及堡等五人。把持朝政。罔上行私罪。由榔以彭年有歸附功。免議。下堡等錦衣獄。杖之。大學士嚴起恒。跪由榔舟。力請留守。大學士瞿式耜。七疏論救。皆不納。命法司定議。堡以語觸時忌。與時魁並謫戍湘客。正發。贖配追贓。由榔再召朱天麟。天

我

麟疏言。年來百爾構爭。盡壞實事。昔宋高宗航海。猶有退步。今則何地可退。當奮然自將。文武諸臣。盡擐甲胄。臣亦抽峒丁。擇土豪募水手。經畧嶺北湖南。爲六軍倡。若徒責票擬。以爲主持政本。今政本安在乎。時召天麟入直進官而已。

大清兵圍廣州

時李赤心已死。養子來亨代領其衆。推高必正爲主。

大兵圍廣州。桂王由榔命陳邦傳與必正東援。邦傳故與李元允有隙。意在修怨。又憾必正等之屢擾其境也。陰令副將姚春登等連結土司。會來亨等調兵土司。遂相讐殺。必正怒而歸。邦傳駐清遠。馬吉翔駐三水。俱不敢進。廣州城守久。李元允弟建捷拒戰甚力。由榔封爲安

肅伯

我

大清兵克全州。

平南王孔有德帥師征廣西。曹志建戰敗。

大兵入龍虎關。馬進忠復敗於瓜里。走入武岡。桂林大震。百姓苦諸鎮鈔掠競迎。

王師長驅入全州。開國公趙印選居桂林。衛國公胡一青守榕江。與寧遠伯王永祚皆懼不敢出。

大兵遂入嚴關。無一禦者。

夏六月。桂王由榔罷其大學士嚴起恒官。尋召還。

起恒潔廉遇事持平。與馬吉翔龐天壽共患難久。無所

忤五虎憾起恒。詆爲邪黨。及五虎得罪。起恒反力救。吳貞毓等惡之。乃請召還王化澄。而合攻起恒。給事中雷德復劾其二十餘罪。比之嚴嵩。由榔不悅。奪德復官。起恒力求罷。由榔輒留之。不得。放舟竟去。會鄖國公高必正入朝。貞毓欲藉其力以傾起恒。言朝事壞於五虎。主之者起恒也。公入見。請除君側奸。數言決矣。必正許之。有爲起恒解者。謂必正曰。五虎攻嚴公。嚴公反救五虎。此長者。奈何以爲奸。必正見由榔。乃力言起恒虛公可任。請由榔手敕。邀與俱還。

孫可望復遣使求封於桂王由榔。

可望欲真得秦封。不受景國公命。遣使至梧州問故。由

榔始知矯詔事。瞿式耜上疏請斬胡執恭。不納。馬吉翔
議封可望。激江王。使者言非秦不敢復命。大學士嚴起
恒持不可。兵部侍郎楊鼎和。江安人給事中劉堯珍。鎮雄人

等助之。且請却所獻白金玉帶。時高必正尚在梧州。因
召使者言。本朝無異姓封王例。我蕩覆北京。蒙恩宥赦。
亦止公爵爾。張氏竊據一隅。封上公足矣。安敢冀王爵。
自今當與我同心報國。洗去賊名。毋欺朝廷孱弱。我兩
家士馬足相當也。又致書可望。詞義嚴正。使者唯唯。退
議遂寢。可望不得封。益怒。

秋九月。孫可望率兵至貴州。

可望由雲南東襲貴州。匡國公皮熊走清浪衛。追執之。

奪其兵。又遣白文選攻破遵義。忠國公王祥自刎死。降其衆二十餘萬。張先壁馬進忠皆歸於可望。勢益強。孫可望遣兵據嘉定。

初。桂王由榔遣李乾德入蜀。自巡撫進尚書。經略川湖雲貴軍務。乾德察諸將。惟袁韜最勇悍可用。力說之。攻佛圖關。取重慶。亡何。諸將大會。韜以位高。坐李占春上。占春怒。并怒乾德。欲襲取之。乾德占星氣有異。走匿山谷間。占春襲韜不克。搜乾德船。取其孥而返。尋還之。諸將益相猜。韜及武大定久駐重慶。食盡。乾德說嘉定楊展與大定結爲兄弟。資之食。已而乾德利展富。搆韜殺之。分其貲。蜀人咸不直乾德。可望聞展死。將圖蜀。乃爲

展訟寃。使王自奇將兵由川南進。而別遣劉文秀渡金沙河。出黎州。趨嘉定。韜大定方拒自奇於川南。撤師還救。自奇尾擊之。韜大定大敗。悉被擒。嘉定陷。乾德以其父死於流賊也。曰。吾不可再辱。驅家人與其弟御史升德俱赴水死。乾德升德。賜諡忠節。文秀兵復東。譚宏譚詣譚文盡降。乃遣盧名臣下涪州。占春敗走。于大海在忠州。知不支。引兵出夔入楚。與占春來降於

王師。文秀遂據蜀。

冬十一月。我

大清兵克廣州。

廣州城三面臨水。李成棟在時。復築兩翼。附于城外。爲

砲臺水環其下。

大兵攻圍。十閱月不下。杜永和偏將范承恩約內應。決砲臺之水。

大兵藉薪徑渡。遂得砲臺。是月二日。克其城。承恩來降。永和由海道奔瓊州。

我

大清兵克桂林。桂王由榔留守大學士臨桂伯瞿式耜等死之。

王永祚。胡一青。俱以領餉入桂林。榕江一帶皆空壁。

大兵益深入。是月五日。式耜檄趙印選出城。爲戰守計。不肯行。再趣之。則盡室逃。一青及武陵侯楊國棟。綏寧伯

蒲纓寧武伯馬養麟亦逃去永祚迎降城中無一兵式
耜端坐府中家人亦散部將戚良勛請式耜上馬速走
式耜堅不聽叱退之適兵部侍郎總督諸路軍務張同
敞同敞以式耜薦爲總督有文武才每出兵輒躍馬爲
敵諸將先或敗奔同敞危坐不去諸將復還戰或取勝
軍中以自靈川至見式耜式耜曰我爲留守當死此子
是服之無城守責盍去諸同敞正色曰昔人恥獨爲君子公顧
不許同敞共死乎式耜喜取酒與飲一老兵侍式耜令
召中軍徐高付以敕印屬馳送桂王由榔是夕兩人秉
燭危坐達旦黎明數騎至式耜曰吾兩人待死久矣遂
與偕行至則踞坐於地諭之降不從令爲僧亦不從乃
幽之民舍兩人雖異室聲息相聞曰賦詩倡和得百餘

首閱四十餘日。將就刑。式耜從容肅衣冠。南向拜訖。與同敞並死。同敞屍植立。首墜。躍而前者三人。皆辟易。

式耜

賜諡忠宣。同敞。賜諡忠烈。

桂王由榔奔南寧。

由榔至潯州。亂卒夜掠街市。火光燭天。由榔亟解維。衝雨而去。陳邦傳在清遠。飛帆先歸。邀劫從官于藤江。殺部郎潘駿觀。童英。許王鳳等。由榔踉蹌至南寧。胡一青。趙印選。率兵駐賓州。

我

大清兵克平樂。

大兵由灌陽至平樂。桂王由榔征西將軍朱旻如

臨桂人。

固

守城破。旻如殺其妻子自刎死。焦璉方往禦鎮峽關聞

之遂走梧州。

旻如。賜諡烈愍。

辛卯我

大清

世祖章皇帝順治八年春二月我

大清兵克肇慶高州梧州柳州諸府。

總兵許爾顯克肇慶及羅定州徐成功克高州線國安

馬蛟麟克梧州二州桂王由榔南陽伯李元允安肅伯

李建捷自肇慶走南寧尋請出靈山收高雷兵復擾廣

東郡縣。

孫可望遣兵至南寧迎桂王由榔遂殺其大學士嚴起恒

等。

在封侯不送金車

卷之二十一

十一

由榔走南寧。見事急。乃遣編修劉蔭封孫可望。冀王可望仍不受。楊畏知曰。秦冀等爾。假何如真。可望不聽。李定國等勸可望遣畏知終其事。可望許之。先遣部將賀九儀。張勝。張明志等率勁卒五千迎由榔。九儀直上嚴起恒舟。怒目攘臂。問王封是秦非秦。嚴起恒曰。君遠迎主上。功甚偉。朝廷當有隆恩。若專問此事。是挾封。非迎主上也。九儀怒。格殺之。投屍于江。遂殺給事中劉堯珍。吳霖。欽縣人。張載述。涇縣人。追殺兵部尚書楊鼎和於崑崙關。皆以阻封議故。起恒。鼎和。俱珍。霖。載述。俱賜諡忠節。堯麟力勸由榔從。可望請赴雲南。諸臣以起恒被殺。皆不

賜諡忠節。堯

朱天

可。乃命天麟經畧左右兩江土司。而真封可望爲秦王。畏知旋至。痛哭自劾。語多侵可望。由榔因留爲東閣大學士。與吳貞毓同輔政。可望聞之怒。使人召至貴陽。面責數之。畏知大憤。除頭上冠。擊可望。遂被殺。楚雄人立祠以祀。畏知。賜諡忠節。

三月。我

大清兵克嘉定。

劉文秀旣據蜀。旋還雲南。留白文選守嘉定。劉鎮國守雅州。至是。

大兵南征。文選鎮國。戰敗。挾曹勛遁走。

王師遂入嘉定。桂王由榔巡撫川南。僉都御史范文光賦

詩一章。仰藥死。巡撫川北僉都御史詹天顏。兵敗于石

泉。就執不屈死。

總督尚書樊一蘅。時已謝事。避山中。至九月。亦邁疾死。

范文光。詹天顏俱

忠節。賜諡。

夏四月。桂王由榔遣其大學士文安之督師四川。爲孫可望所阻。不果行。

安之應由榔召至梧州。從赴南寧。以

大兵日迫。而雲南又爲孫可望所據。不可往。念川中諸鎮兵尚強。欲結之爲援。乃自請督師。加諸鎮封爵。由榔從之。加安之吏兵二部尚書。總督川湖諸處軍務。賜劍便服。從事。進諸將王光興。郝永忠。劉體仁。袁宗第。李來亨。王友進。塔天寶。馬雲翔。郝珍。李復榮。譚宏。譚詣。譚文黨。

守素等公侯爵卽令安之。齎敕印行。可望聞而惡之。遣兵伺於都勻。邀止安之。追奪光興等敕印。留數月。乃令入湖廣。安之遠客他鄉。無所歸。復赴貴州。將趨謁由榔。可望誣以罪。戍之畢節衛。

秋八月。我

大清兵克舟山。魯王以海遁入海。

都統金礪。劉之源。總督陳錦。提督田雄等。會師討舟山。以大艦乘潮出洋。至蛟門。魯王以海遣阮進拒戰。敗死。
進。賜諡烈愍。

大兵乘天霧集螺頭門。守陴者方覺。定西侯張名振。兵部尚書張煌言。奉以海航海去。屬大學士張肯堂城守。城

中兵六千居民萬餘堅守十餘日

大兵掘地道破其城肯堂衣蟒玉南向坐令四妾二子婦

一女孫先死乃從容賦詩自經一時同死者兵部尚書

李向中鍾祥人以下凡二十一人大帥召向中不赴發兵捕之以衰絰見大帥呵

之曰聘汝不至捕卽至何也向中從容曰前則辭官今

就戮爾遂死之禮部尚書吳鍾巒常往來普陀山

大兵至寧波鍾巒慷慨謂人曰昔仲達死當禍吾以諸

生不得死君常死賊難吾以遠臣不得從死今其時矣

乃急渡海入昌國衛之孔廟積薪左廡下抱孔子木主

自焚死仲達者鍾巒弟子李應昇君常者鍾巒友馬世

奇也左都督張名揚乃名振弟與其母范以下數十人

皆自焚死吏部侍郎上海朱永佑安洋將軍上元劉世
勳通政司會稽鄭遵儉兵科給事中鄞縣董志寧兵部
郎中江陰朱養時戶部主事福建林瓊蘇州江用提禮
部主事會稽董元兵部主事福建朱萬年長洲顧珍臨
山衛李開國工部主事長洲顧中堯中書舍人蘇州蘇
兆人工部所正鄞縣戴仲明定西侯參謀顧天顧明楫
諸生福建林世英內官監太監劉朝俱不屈死開國母

瑛明棹妻皆目盡錦衣指揮王朝相聞城破護以海妃
陳氏貴嬪張氏義陽王妃杜氏入井用巨石覆之自刎
其旁肯堂賜諡忠烈向屯

志寧賜諡忠節永作世勲名揚朝相俱賜諡

烈愍遵儉養時瑛用棹元萬年珍開國中堯兆人仲以
明俱賜諡節愍明棹世英俱賜祀忠義祠以

海漂泊無所歸。檣舟南日山颶風大作其大學士沈宸

荃沒於海。宸荃。賜諡忠節。

九月我

大清兵克潯州。

定南王孔有德率師駐賓陽遣總兵線國安等分路畧

定廣西郡縣桂王由榔慶國公陳邦傳在潯州宣國公

焦璉兵敗走武靖邦傳邀與俱降璉不從邦傳殺之函

其首遣使以潯南之地及所部兵來歸璉。璉烈愍。賜

冬十一月。魯王以海遁居金門。

以海舟次巖頭。鄭成功移之金門。禮待頗恭。以海既失其衆。乃自去監國號。遣使間道奉表於桂王。由榔久之。張名振亦卒。成功事以海益懈。以海積不能平。將往南澳。成功使人沈之海中。張煌言自以海死後。散遣部曲遁居懸壘爲降不從。戮於杭州。煌言。賜諡忠烈。

十二月。桂王由榔奔廣南。

孫可望既移駐貴陽。議移由榔自近。挾以作威。其將掌塘報者曹延生。悉由榔大學士吳貞毓。言不可移黔。至是。

大兵盡定廣西諸府。南寧危迫。由榔召諸臣共議。有請走

海濱依李元允者。有議入安南避難者。有議泛海抵閩。依鄭成功者。惟馬吉翔。龐天壽。結可望。堅主赴黔。貞毓入延生言不敢決。元允疏請出海。由榔不欲就可望。而以海濱遠。再下諸臣議。終不決。亡何。開國公趙印選衛國公胡一青。殿後軍。戰敗奔還。請由榔速行。急由水道走土司。抵瀨湍。二將報。

大兵益近。相距止百里。上下失色。皆散去。已次羅江土司。追騎相距止一舍。會日晡引去。乃稍安。次龍英抵廣南。歲已暮矣。大學士朱天麟扶病追從由榔。以明年四月始抵廣南。病篤不能入見。卒於西坂村。

後漢書

卷之二十一

三

御批歷代通鑑輯覽卷之一百二十

附明唐桂二王本末

桂王三

壬辰
我

大清

世祖章皇帝順治九年春二月。孫可望刼遷桂王由榔于安隆所。可望遣兵遷由榔入居安隆所。改爲安龍府。可望歲以銀八千兩。米百石爲供。從官皆取給焉。宮室庫陋。服御粗惡。守護將承可望意。無復人臣禮。由榔不堪其憂。時馬吉翔掌戎政。龐天壽督勇衛營。俱諂事可望。惡大學士吳貞毓不附已。令其黨冷孟鉅。吳象元。方祈亨。交章彈擊。且語孟鉅等曰。秦王宰天下。我具啟以內外事盡

付戎政勇衛二司。大權歸我。公等爲羽翼。貞毓何能爲。

吉翔遂遣門生郭璘說主事胡士瑞。進賢人。擁戴秦王。士

瑞怒厲聲叱退之。他日吉翔遣璘求郎中古其品畫堯

舜禪受圖以獻。可望其品拒不從。吉翔譖于可望。杖殺

其品。而可望果以朝事盡委吉翔。天壽於是士瑞與給

事中徐極。江西人。員外郎林青陽。新寧人。蔡縝。九江人。主事張

鐫。寧國人。連章發其奸謀。由榔大怒。兩人求救于太妃。乃

免。

夏五月。李定國犯湖南。

定南王孔有德率輕兵出河池向貴州。以

大軍駐柳州接應。孫可望乃謀入犯。使李定國馮雙禮由

黎平出靖州。馬進忠由鎮遠出沅州。會於武岡。以圖桂林。劉文秀、張先璧由永寧出敘州。白文選由遵義出重慶。會於嘉定。以圖成都。可望言於由榔。封定國西寧王。文秀南康王。定國進攻靖。沅、武岡俱陷之。有德還守桂林。

我

大清兵襲桂王。由榔總督尚書揭重熙於廣信。殺之。

先是金聲桓既伏誅。江西諸軍盡散。獨總兵張自盛衆數萬走閩。重熙入其軍。約廣信曹大鎬。刻期竊發。兵部侍郎傅鼎銓亦往來兩家軍中。自盛掠邵武。戰敗。就擒。鼎銓爲廣信守將所執。繫南昌獄。諭降不從死。事在順治八年。

至是重熙率數十人赴大鎬於百丈礫。適大鎬還軍鉛山。惟空營在。衆就營炊食。

大兵偵得之。率衆至。射重熙中項。執至建寧。下之獄。重熙覓死具不得。日整衣冠。拜呼祈死。及就刑。昂首受刃。顏色不改。大鎬等亦敗死。自是江右之阻兵抗命者盡矣。

重熙。賜諡忠烈。鼎銓以曾降流賊。初節有虧。廷議不予諡。

六月我

大清兵克高雷廉瓊諸府。

我

大兵自雷州進抵廉州。遣將攻欽州。靈山。桂王由榔南陽伯李元允爲土兵執送軍前。不順命。與弟建捷俱斬于

市。遂克瓊州。杜永和來降。巡撫高雷廉瓊四府右僉都御史張孝起走避龍門島。島破。就執。不食七日死之。孝起

賜諡忠節。

秋七月。李定國陷桂林。

李定國由西延大埠。疾趨而進。

大兵遇於全州。不利。定國薄桂林。驅象來攻。城遂陷。定南

王孔有德自經。定國獲陳邦傳及其子曾禹。去其皮而

殺之。傳屍安隆。

桂王由榔御史李如月劾孫可望不請旨。擅殺勛鎮罪同莽操。而請加邦傳惡

諡以懲不忠。由榔知可望必怒。留其疏。召如月入諭。以諡本褒忠。無惡諡理。小臣妄言亂制。杖四十除名。意將解可望。而可望大怒。遣人至由榔所。執如月至朝門外。抑使跪。如月憤甚。極口大罵。其人遂剔其皮。斷其手足。及首。實草皮內。紉之。懸于通衢。賜諡烈愍。定國分兵犯廣西郡縣。

如月。東莞人。

梧州。柳州相繼陷。又遣白文選攻陷辰州。總兵徐勇戰歿。

冬。十月。孫可望遣兵犯四川。

可望遣劉文秀等入四川。進據成都。

大兵退守保寧。文秀等悉衆來攻。直薄城下。連營十五里。大兵迎擊。大敗之。斬其將王復臣。

十一月。我

大清兵擊敗李定國于衡州。

定遠大將軍敬謹親王尼堪等帥師南征。次湘潭。馬進忠等遁去。

大兵遂進。去衡山縣三十里。擊退其衆。兼程趨衡州。方列

陣。定國兵已至。

大兵奮力衝擊。定國兵敗走。斬獲無算。敬謹親王自率精騎追之。遇伏。歿于陣。定國乃收兵退屯武岡。

癸巳
我

大清

世祖章皇帝順治十年春二月。李定國自湖南遁走廣西。

定國既連陷楚粵諸郡。兵力益強。不復稟孫可望約束。可望忿甚。會定國敗于衡州。可望使人召之。赴沅州議事。將以爲罪而殺之。定國覺其意。辭不行。至是。定國率馬進忠等犯永州。定遠大將軍多羅貝勒吞齊等帥師自衡州進擊。未至。定國已遁。度龍虎關而去。遂入廣西。

時

大軍已克復桂林府。定國乃據柳州。

三月。我

大清兵擊敗孫可望於寶慶。

可望自率兵追李定國。由靖州進次寶慶。

大兵偵知之。自永州迎擊。與馮雙禮等遇於周家坡。雙禮營山頂。據地險。與

大兵相拒。可望帥前軍乘夜至。與雙禮合。明日。率眾下山來犯。

大兵分路奮擊。可望大敗。斬馘甚衆。可望遁還貴州。盡殺明宗室之在黔者。

夏李定國犯廣東。

孫可望憾李定國益甚。然以其將兵在外。不敢輕樹敵。仍厚養其妻子於雲南。定國亦防可望襲之。益思據地自固。乃與馬寶由懷集犯廣東。攻圍肇慶。

大兵自廣州來救。敗之四會河口。定國移兵犯平樂。陷之。府江道周永緒。平樂知府尹明廷等遇害。又攻高州。廉州。雷州諸府亦俱爲所陷。

秋。桂王由榔遣使於李定國。

先是由榔在安隆。塗葦薄以自蔽。日食脫粟。窮困備至。而前御史任僕。中書方于宣等。屢勸進於孫可望。可望遂自設內閣六部等官。可望初欲設六部翰林官。慮人議其僭。乃以范鑛。馬兆義。任僕。

萬年策。爲吏戶禮兵尙書。並加行營之號。後又以程源代年策。而俱最寵。屢勸可望僭號。可望令待由榔入黔。議之。由榔久駐安隆。可望乃自設內閣六部官。以文安之。爲東閣大學士。安之。不爲用。走川東。依劉體仁等以居。

立太廟。定朝儀。改印文爲八疊。盡易其舊。由榔聞之。憂懼。密謂中官張福祿。全爲國曰。聞李定國已定廣西。軍聲大振。欲密下一敕。令統兵入衛。若等能密圖乎。二人言。徐極。林青陽。張鐫。蔡續。胡士瑞。曾疏。劾馬吉。翔。龐天壽。宜可與謀。由榔卽令告之。五人許諾。引以告大學士吳貞毓。貞毓曰。主上憂危。正我輩報國之秋。諸君中誰能充此使者。青陽請行。乃令佯乞假歸葬。而使員外郎蔣乾昌。晉江人。撰予定國敕。主事朱東旦。四川人。書之。福祿等持入用寶。青陽于歲盡間道馳至定國所。定國接

敕感泣。許以奉迎。然以兄事可望久。未敢經發。事在順治九年。

至是。青陽久未還。由榔將擇使往促。貞毓以翰林孔目

周官

臨川人。

對都督鄭允元

歙縣人。

曰。吉翔晨夕在側。假他

事出之外。庶有濟。由榔乃令吉翔奉使。祭桂王常瀛及

太妃墓于梧州。南寧。而遣周官詣定國。時青陽亦已還

至南寧。爲守將常榮所留。密遣親信劉吉告由榔。由榔

喜。改青陽給事中。諭貞毓再撰敕。鑄屏翰親臣金印。令

吉還付青陽。至廉州。周官與青陽遇。偕至高州。賜定國

定國拜受命。

甲午
我

大清

世祖章皇帝順治十一年春三月孫可望遣人劫桂王由榔殺其大學士吳貞毓等。

馬吉翔之出使也。在道微知林青陽密敕事。遣人至李定國營偵之。主事劉議新者道遇吉翔。意其必預謀也。告以兩使齎敕狀。吉翔驚駭。啟報孫可望。可望大怒。并疑吉翔預謀。遣其將鄭國赴南寧逮之。會張鐫胡士瑞李元開善化人以由榔親試蔡縝徐極朱東旦及御史林鍾湖廣人以久次皆予美官。龐天壽及吉翔弟都督雄飛忌甚。與其黨郭璘方謀陷之。而鍾縝極鐫士瑞亦知事洩。倉皇劾吉翔。天壽表裏爲奸。由榔見事急。卽下廷臣議罪。天壽懼。與雄飛馳赴貴陽告可望。而鄭國亦已械

吉翔至安隆。與諸臣面質。貞毓謝不知。國怒。因挾貞毓。

直入由榔所居。迫脅由榔。索主謀者。由榔懼。不敢正言。

謂必外人假敕寶爲之。國遂努目出。械貞毓。并允元鍾。

續。元開極鑄。士瑞東旦。蔣乾昌。及太僕少卿趙貴禹。袁州

人。御史周允吉。錢塘人。朱議展。南昌人。員外郎任斗墟。鄞縣人。

主事易士佳。廬陵人。繫私室。又入由榔所居。擒福祿。爲國。

而出其黨。冷孟鉅。蒲纓。宋德亮。朱企鰲等。迫由榔速具。

主名。由榔悲憤而退。翊日。國等嚴刑拷掠。獨貞毓以大。

臣免。衆不勝楚。大罵。時日已暮。風雷忽震烈。續厲聲曰。

今日續等直承此獄。稍見臣子報國苦衷。由是衆皆自。

承。國又問曰。主上知否。續大聲曰。未經奏明。乃復收繫。

以欺君悞國盜寶矯詔爲罪報可望可望請由榔親裁
由榔不勝憤下諸臣議吏部侍郎張佐辰及纓德亮孟
鉅企鏐蔣御曦等謂國曰此輩盡當處死倘留一人將
爲後患於是御曦執筆佐辰擬旨以鏐福祿爲國爲首
罪凌遲餘爲從罪斬由榔以貞毓大臣言於可望罪絞
諸臣就刑神色不變各賦詩大罵而死其家人合瘞於
安隆北關之馬場已而青陽逮至亦被殺獨周官走免
貞毓賜諡忠節青陽鏐士瑞元開續極東旦鍾元
元乾昌廣禹允吉議屨斗墟士佳俱
冬十月李定國陷高明

李定國兵猝至陷高明進圍新城城中糧盡殺馬爲食
平南王尙可喜靖南王耿繼茂率師往援次三水靖南

將軍珠瑪喇等亦至。合兵進擊。敗之于珊州。斬其副將一人。既抵新會。定國據險以拒。

大兵奮擊。奪其山。殲獲甚衆。定國大敗遁去。

乙未我

大清

世祖章皇帝順治十二年春三月。李定國遁走南寧。

定國自新會敗走。

大兵追擊。及于興業縣境。又蹙之橫州江。屢敗之。定國焚橋而去。

大兵躡之。定國率殘兵。自賓州走南寧。廣東高雷廉等三府三州十八縣。及廣西橫州等二州四縣悉平。

夏六月孫可望遣兵犯常德敗走。

可望遣劉文秀盧明臣馮雙禮等率衆六萬船千餘艘分兵由常德攻岳州武昌而文秀自留攻常德。

大兵設伏邀擊之焚獲戰艦甚多賊衆大敗明臣赴水死雙禮被重創走降其將四十餘人文秀遁還貴州。

丙申我

大清

世祖章皇帝順治十三年春二月李定國走安隆以桂王由榔奔雲南。

大兵至南寧李定國戰敗將由安隆走滇孫可望偵知之使白文選促由榔移黔文選雖爲可望用然心不直其

所爲。因以情告由榔曰。姑遲行。候西府至。西府謂定國也。定國至安隆。文選歸之。共奉由榔自安南衛走雲南。時守滇者爲劉文秀。王尙禮。王自奇。賀九儀。文秀數怨可望。遂私送定國。迎由榔入滇。居可望署中。由榔封定國晉王。文秀蜀王。文選鞏昌王。尙禮等皆封公。令文選還黔。慰諭可望。可望銜其貳於定國也。悉奪所部兵。羈之軍中。然以妻子在滇。未敢遽與由榔爲難也。

桂王由榔以其文安侯馬吉翔入閣辦事。

李定國旣奉由榔至滇。卽捕馬吉翔及其家人。令步將靳統武收繫。將殺之。吉翔曰。媚統武。定國客詣統武。吉翔復媚之。因相與譽吉翔於定國。而微爲辨冤。定國召

吉翔入謁。卽叩頭言。王再造功。千古無兩。吉翔幸望見
顏色。死且不朽。他是非何足辨也。定國乃大喜。吉翔因
曰。諂定國客。令說定國薦已入內閣。遂與定國客蟠結。
盡握中外權。龐天壽亦復用事。定國與劉文秀。時詣二
人家。光祿少卿高勣。字無功。紹興人。御史鄔昌期。都勻人。患之。合
疏言。二王功高望重。不當往來權倖之門。恐滋奸弊。復
蹈秦王轍。疏上。定國。文秀。遂不入朝。吉翔激由榔怒。命
各杖一百五十除名。定國客金維新走告定國曰。勣等
誠有罪。但不可有殺諫官名。定國卽偕文秀入救。乃復
官。

大清

世祖章皇帝順治十四年秋九月孫可望以兵攻桂王由榔于雲南與李定國戰可望敗走遂降于我

大清

是年春由榔遣張虎送可望妻子還黔。可望遂舉兵反由榔。然人心多不直可望。部下諸將皆願歸李定國。馮進忠等說可望請以白文選爲大將。可望從之。乃留馮雙禮守貴州。而以文選統諸軍前行。李定國劉文秀帥師禦之。是月至三岔河。與可望夾水而軍。文選輕騎奔定國。可望遣張勝馬寶由尋甸間道襲雲南。而自將勁卒擊定國。戰方合。其將馬惟興先走。一軍瓦解。可望狼

狼奔回。定國恐會城有失。遣文秀文選追之。而自引兵先還。遇張勝于渾水塘。擒而殺之。馬寶亦歸定國。可望至貴州。馮雙禮給言追兵且至。可望知人心已散。遣其將程萬里赴

大軍納款。可望行至沙子嶺。總兵楊武追襲幾殆。賴

大兵馳援方免。可望遂挈妻子至長沙來降。雙禮截其子女玉帛。與文秀同歸雲南。由榔封雙禮慶陽王。進忠漢陽王。惟興等進爵爲公。

臣等謹案孫可望本獻忠餘孽。既乃臣事桂王。邀求爵命。而又稱兵挾制。反戈相向。及爲李定國所敗。始以窮蹙來歸。跡其反覆不常。實爲險賊之尤者。當日因其新附。量行封賞。近史館以可望列傳進

呈。
特命削除世職。

權衡予奪。實協好惡之至公。足知稔惡者雖及身倖免而王鈇所被。大義必伸於千古也夫。

戊戌
我

大清

世祖章皇帝順治十五年夏五月我

大清兵平貴州。

寧南靖寇大將軍宗室羅託等由湖南平西大將軍平西王吳三桂等由四川征南將軍趙布泰等由廣西分兵三路入黔。時劉文秀已死。李定國使劉正國揚武守三坡紅關諸要隘以防蜀。馬進忠守貴州。會其將王自奇關有才。貳於定國。定國自將擊之。楚師自鎮遠入定國不及援。粵師亦盡下南丹。那地。獨山諸州。會於貴陽。

進忠遁去貴州平。

六月我

大清兵克遵義。

蜀師至三坡。劉正國拒戰大敗。自水西奔回雲南。

大兵遂克遵義。

初李定國既敗孫可望兵。自以爲無他患。武備盡弛。高勣與郎官金簡進諫曰。今內

難雖除。外憂方大。而我酣歌漏舟之中。熟寢燕薪之上。能旦夕安耶。二王老于兵事。胡泄泄如此。定國愬之桂王。由榔語頗激。由榔欲杖二臣以解之。諸臣多爭不可。移時未決。而三路敗書至。定國始逡巡引謝。二臣獲免。

金簡字萬

藏。山陰人。

冬十二月我

大清兵入雲南。李定國敗走。桂王由榔奔永昌。

時三路

大兵俱集貴州。安遠大將軍信郡王多尼至軍。會于平越府之楊老堡。戒期入滇。李定國與馮雙禮等扼雞公背。圖侵貴州。使白文選守七星關。立營窺遵義。以牽蜀師。蜀兵出遵義趨天生橋。由水西直取烏撒。文選懼。棄關走霑益州。粵兵至盤江。敵據險沈船不得渡。泗城土知府岑繼祿獻策。從下流潛師宵濟。遂入安隆。定國使其將吳子聖拒戰。潰走。定國以全軍據雙河口。

大兵擊之。破其象陣。又連敗之。羅炎。涼水井。定國大營妻子俱散失。諸將各敗走。不相顧。定國撤寨遁歸。桂王由榔將出奔。行人任國璽福建人獨請死守。由榔合諸臣議。定國等言。行人議是。但前途尙寬。今暫移蹕。捲土重來。

再圖恢復未晚也。由榔遂走永昌。

臣等謹案桂王入滇以後已無地自存。李定國等金底游魂。尙敢抗我

王師冀稽

天討。臣等因史文之舊。書之爲賊。乃蒙我

皇上中正持衡。

特命改書敵字。俾殷餘頑梗。不與闖獻同科。

筆削公平。折衷至當。

大聖人之心。真與天地同符矣。

已亥我

大清

世祖章皇帝順治十六年春正月我

大清兵克雲南。桂王由榔奔騰越。

是月三日。

大兵自普安州入雲南省城。永昌警報日至。由榔復走騰

越

二月我

大清兵克永昌。桂王由榔奔緬甸。

白文選自霑益追及李定國。定國留之斷後。至玉龍關。

大兵追擊之。文選戰敗。由右甸遁走木邦。

大兵克永昌。渡潞江。定國設伏於磨盤山。

大兵覺之。分精甲先蹂伏處。定國不能支。退走騰越。遣總

兵靳統武率兵四千從由榔。時李國泰馬吉翔輜重多。

恐遭刼奪。促由榔夜走南甸。兵馬過處。火光燭天。右轉

左旋。天明仍在故處。統武棄由榔。仍歸定國。由榔抵囊

木河。是爲緬界。緬人勒從官盡去兵器。方許入境。至蠻

暮土司緬人以四舟迎之。從官皆自覓江舟。隨行者六

百四十餘人。陸行者自故岷王子而下。九百餘人。期會

於緬甸。

昆明諸生薛大觀聞由榔入緬甸。歎息曰。不能背城戰。君臣同死。社稷顧欲走蠻邦。以苟活。不

重可羞耶。

遂與其妻及子之翰夫婦偕赴城北黑龍潭

死。其侍女抱

勿子從之。次日。諸屍相牽浮水上。勿子在

侍女懷中。

兩手堅抱如故。大觀次女已適

人。避兵

山中。相去數十里。同日赴火死。

夏五月。緬人置桂王由榔于赭磴。以兵防之。

初。由榔至井亘。其羣臣沐天波等謀奉之走戶臘二河。

不聽。緬人邀大臣過河面議。以冊寶視神宗時。差小。疑

以爲假。天波出黔國公印對同。乃信。因請由榔敕關上。

無得納漢兵。是月四日。緬復以舟迎由榔。明日發井亘。

行三日。至阿瓦。阿瓦者。緬酋所居城也。又五日。至赭磴。

始知前陸行者。盡被緬人掠爲奴。多自殺。惟岷王子等八十人。流入暹羅。緬人於赭磴置草屋。居由榔。以竹爲城。從行諸臣。或短衣跣足。與緬婦相貿易。爲笑樂。大爲緬人嗤。

秋八月。我

大清兵定四川。

初。李赤心養子來亨等。久竄廣西。其衆食盡。且懼。

大兵進討。率衆走川東。分據川湖間。耕田自給。川中舊將王光興。譚宏等。附之。衆猶數十萬。桂王由榔。大學士文安之。因率來亨及劉體仁。袁宗第等十六營。由水道襲重慶。會譚宏。譚詣。殺譚文。諸將不服。安之欲討二人。二

人懼。率所部降於

大兵。諸鎮遂散。安之亦卒。至是。

大兵進取川南。克敘州馬湖二府。總兵杜之香降。成都餘黨聞風逃遁。

大兵追至新津。斬溺無算。全川底定。於是獻忠餘孽之擾蜀者亦盡矣。

桂王由榔令其黔國公沐天波以臣禮見緬酋。

緬俗以中秋日大會羣蠻。其酋欲誇示諸國。請天波過河。令椎髻跣足。用臣禮見。天波不得已從之。歸泣告衆。

曰。我所以屈辱者。懼驚憂主上耳。否則彼將無狀。我罪益大。任國璽與禮部侍郎楊在餘姚人。劾奏之。時麗天壽已死。李國

泰代掌司禮。吉翔復與表裏為奸。一日吉翔奏大臣有三日不舉火者。桂王由榔不應。明日吉翔國泰合奏。由榔怒。以御寶擲下。吉翔即鑿而碎之。散給諸臣。其凶悖如此。任國璽集宋末大臣賢奸事為一書進之。由榔吉翔恨之。由榔覽止一日。國泰即竊去。國璽又疏論時事。三不可解。中言禍急燃眉。當思出險。吉翔不悅。即令國璽獻出險策。國璽忿然曰。時事至此。猶抑言官使不言耶。臣等謹案桂王倚任宦豎。寵用王坤。龐天壽復蹈北都覆轍。至緬地流離。託身無所。而李國泰猶代天壽掌司禮監。與馬吉翔表裏為奸。在若輩宵人。惟知縱情網利。取快目前。遑顧其主。而桂王受制羣閹。至於流播蠻方。尚不知悟。明代宦寺流毒。積漸之勢。遂至此極。亦良可浩歎耳。

冬十一月我

大清兵克沅江。

桂王由榔之走永昌也。道過沅江。土知府那嵩與其子燾迎謁。供奉甚謹。設宴皆用金銀器。宴畢悉以獻。曰。此

行上供者少。聊以佐缺乏耳。由榔既走緬甸。李定國不敢深入。聞白文選在木邦。就之謀。與文選計不合。定國乃引兵。自孟定過耿馬。抵猛緬。孟艮不附。定國移兵滅之。據其地。遣使號召諸土司兵。嵩亦於沅江起兵應之。至是。

大兵進討。城破。嵩登樓自焚。合家皆死。其士民亦多巷戰。

死。嵩。賜諡烈愍。

庚子我

大清

世祖章皇帝順治十七年秋九月。白文選攻緬甸不克。

文選自木邦至錫箔。所至縱兵大掠。進攻阿瓦。索桂王。

由榔阿瓦有新舊二城。新城緬酋所居。文選急擊之。城且破。爲緬人所紿。退兵十里。城中備禦復固。反爲所敗。文選乃引兵赴孟艮。會李定國。定國復同文選赴阿瓦。

辛丑我

大清

世祖章皇帝順治十八年夏五月。李定國。白文選。會兵攻緬甸。不克。

桂王由榔久居赭磴。從官資用盡竭。錦衣趙明鑑謀竊其世子以出。爲馬吉翔等所阻。李定國以三十餘疏迎由榔。俱不達。白文選復密遣人告由榔。言不敢速進者。恐有他害。必得緬人送出爲上策。由榔卽以書答之。文

選乃陰造浮橋將迎由榔。爲緬人所覺。事不果。至是定國文選會兵阿瓦。使人入緬求由榔。緬人不許。以象兵與定國戰。定國前隊稍失利。文選引兵橫擊之。緬人大敗。退保新城。然終不肯出。由榔定國文選復議以舟師攻之。遣人於上流造船。爲緬人所燒。定國文選移兵洞烏。未幾文選兵潰走錫箔。定國亦引還。

秋七月。桂王由榔從官盡爲緬人所殺。

時緬酋弟弒兄自立。欲盡殺由榔諸臣。乃遣人告由榔曰。蠻俗貴詛盟。請與天朝諸公飲呪水。馬吉翔李國泰邀諸臣盡往。至則以兵圍之。令諸臣以次出外。出輒殺之。凡殺四十二人。吉翔國泰及黔國公沐天波華亭侯

王維恭。綏寧伯蒲縵。將軍魏豹。都督馬雄飛。吏部侍郎
鄧士廉。禮部侍郎楊在。御史鄔昌期。任國璽。光祿少卿
高勣。兵部郎中金簡等預焉。天波。賜諡忠節。維恭。豹。士廉。在。昌期。國璽。勣。簡。俱。雄飛。以朋奸候主。不予諡。惟都督同知鄧凱。以傷足不
行。獲免。緬人復以兵圍由榔所居。其左右被殺及自縊
者。不可勝數。惟存由榔與其眷屬二十五人。

冬十二月我

大清兵至緬甸。緬人執桂王由榔。獻之於軍前。

平西大將軍平西王吳三桂。定西將軍內大臣公愛星
阿等。帥師征緬。兩路進兵。於十一月初八日。會師木邦。
李定國先奔景線。白文選據錫箔。憑江爲險。

大兵自木邦晝夜行三百餘里。臨江造筏將渡。文選復奔茶山。總兵馬寧等率偏師追之。及於猛養。文選降。

大兵直趨緬城。先遣人傳諭緬酋。令執送由榔。否則兵臨城下。後悔無及。是月初一日。

大兵至緬城。緬酋懼。初三日。遣數十人至由榔所。連坐擁之去。遂并其眷屬送軍前。

大兵凱旋。明年四月。由榔死於雲南。六月。李定國走死猛臘。其子嗣興與劉文秀子劉震等俱來降。

臣等謹案征緬之役。愛星阿分路督師。吳三桂實主其事。當時三桂叛形未著。方以擒渠服遠爲功。臣等編纂初稿。以三桂兇狡不終。削其姓名。但書愛星阿等仰惟我

皇上神謨燭照。親加指示。謂三桂悖亂性成。爾時已包藏禍心。其統兵臨

緬傳諭執送由榔。不足爲三桂之功。轉足以正三桂之罪。蓋三桂非果能戮力本朝也。正欲藉我天威。盡剪明宗枝葉。而李定國。白文選。又皆其比肩委質之人。勢難並立。亦因此盡事殲除。而後可以營窟滇南。不虞後患。然時方鼎革。宿將猶存。未敢顯然肆逆也。迨中朝素有威望。如睿親王。鰲拜。諸人者。相繼淪沒。然後三桂惘然自以爲無一人能制其死命。遂假撤藩之事。乘機背叛。此三桂之畜奸。已非一日。正與曹操司馬懿之用心相似。而其逆蹟。先露於握兵征緬之時。彼既不能盡忠明代。又不思效節本朝。反覆狙詐。實千古亂賊之尤。正宜據事直書。用彰元惡。臣等恭聆

宸諭。

炳若日星。真足殫茲回旣死之魄。明春秋誅隱之義。

謹闡釋

訓詞。

詳悉錄載。以正罪狀。俾

千萬世永爲定案云。

